



N° 7876
Entrée le 07.04.2023
Chambre des Députés
Déclarée recevable
Président de la Chambre des Députés
(s.) Fernand Etgen
Luxembourg, le 07.04.2023

Fernand ETGEN
President vun der
Chamber vun den Deputéierten
19, um Krautmaart
L-1728 Lëtzebuerg

Lëtzebuerg, den 07/04/2023

Här President,

Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministère fir Gesondheet & Sozialversécherung weiderzeleeden.

Am Mee 2022 gouf een éischte Rapport zum Pilotprojet vum medezinesche Cannabis publizéiert. Mëttlerweil ass d'Verschreiwung vu medezineschem Cannabis säit 4 Joer zu Lëtzebuerg méiglech.

An deem Zesummenhang wéilt ech de Ministeren dës Froe stellen:

1. Wéi eng Firma gouf ausgewielt, fir de Stockage an d'Liwierungen un d'Klinicken z'iwwerhuelen?
Op Basis vu wat fir enge Krittäre gouf dës Firma ausgewielt?
2. Am Kader vun der Evaluatioun goufe verschidde Problemer mat dem Logiciel "MSCAN" festgestallt. Dofir sinn d'Auteurs der Meenung, dass e Lien mat dem Persouneregëster an dem MedPerSanitas, dem Regëster vun den Dokteren hei am Land, géif Encodatiounsfeeler verhënneren.
Wéi steet de Ministère (och eng Vue vum Tiers payant généralisé) zu dëser Recommandatioun?
3. An der Äntwert op d'Fro n°7112 huet d'Madamm Ministesch erkläert:

"Bis op den 30. November 2022 si 6 Fläsche Cannabis-Ueleg aus dem Stock erausgaangen."

An der Äntwert op d'Fro n°6171 hat d'Madamm Ministesch erkläert, dass den 30ten Mee 2022 ronn 300 Fläschchen Ueleg am Stock wieren.

- Wéi vill Fläschchen Ueleg si mëttlerweil u Patiente verdeelt ginn?
 - Gëllt nach ëmmer eng Limitatioun, fir den Ueleg just un nei Patienten ze verdeelen?
4. Am Rapport gëtt dann och erkläert, wéi d'Verschreiwungen um medezinesche Cannabis gehandhaabt ginn. Anescht wéi bei normalen Ordonnancen, ginn hei *Carnets à souche* un d'Doktere verdeelt, déi si och mussen zréck schécken un *Division de la pharmacie et des médicaments* fir een neie Block ze kréien.

Ass dëse System, dee méi Opwand fir d'Doktere bedeit, bäibehale ginn?

- Wa jo, firwat?



www.piraten.lu

- Wann nee, duerch wat gëtt en ersat?
5. Vu Februar 2019 op Februar 2021 ass eng Hausse vun 360% vun de Verschreiwunge vu medezineschem Cannabis festgestallt ginn. Spidolsapdikte kruten an dësem Zäitraum 778% méi Cannabis geliwwert.
- Wéi huet de Volummen u geliwwertem Cannabis säit Februar 2021 bis haut evaluéiert?
 - Wéi hunn d'Verschreiwunge säit Februar 2021 evaluéiert?
6. 70% vun de Patienten hu während der Pilotphase ëmmer dee selwechte Produit geholl. Dëst wéisst wéi wichteg eng ofgeséichert Liwwerketten ass. Eng Recommandatioun aus dem Rapport ass ganz kloer, fir d'Fournisseuren ze diversifizéieren. D'Gesondheitsministesch an de Landwirtschaftsminister haten an deem Kontext fir Enn 2022 eng juristesche Etude ugekënnegt, fir den Ubau vu medezineschem Cannabis zu Lëtzebuerg z'erlaben.
- Bis wéini viséieren d'Ministèren, dass dës Projet soll an d'Realitéit ëmgesat ginn?
7. Wäert d'Regierung op de Wee vun enger Verdeelung vum medezinesche Cannabis duerch "normal" Apdikte goen, wéi et och am Rapport recommandéiert gëtt ?
- Wa jo, wat ass hei den Zäitraum?
 - Wa nee, firwat gouf d'Recommandatioun vum Rapport net ëmgesat?

Mat déiwem Respekt,



CLEMENT Sven
Deputéierten





LE GOUVERNEMENT
DU GRAND-DUCHÉ DE LUXEMBOURG
Ministère de la Santé

Gemeinsam Äntwert vun der Madamm Gesondheetsministesch an dem Här Minister fir sozial Sécherheet op d'parlamentaresch Fro n°7876 vum 7. Abrëll 2023 vum honorabelen Deputéierten Här Sven Clement

1. Wéi eng Firma gouf ausgewielt, fir de Stockage an d'Liwwerungen un d'Klinicken z'iwwerhuelen? Op Basis vu wat fir enge Krittäre gouf dës Firma ausgewielt?

D'Auswielprozedur vun engem lëtzebuergesche Grossiste fir d'Liwwerungen a fir de Stockage gouf am Kader vun der Prozedur vum « *Marché négocié* » décidéiert. Fir de Stockage an d'Liwwerungen vun medezineschem Cannabis gëllen déi generell Krittäre fir Stupéfiant'e : de Grossiste muss eng Stupéfiant's-Lizenz zu Lëtzebuerg hunn fir déi dierfen ze handhaben, an d'Méiglechkeet déi Produit'en ënnert Verschluss ze lagere, konform zum Artikel 3 vum Règlement grand-ducal du 19 février 1974 portant exécution de la loi du 19 février 1973 sur la vente des substances médicamenteuses et la lutte contre la toxicomanie. Heifir gouf Hospilux S.A. zréckbehalen.

2. Am Kader vun der Evaluatioun goufe verschidde Problemer mat dem Logiciel "MSCAN" festgestallt. Dofir sinn d'Auteurs der Meenung, dass e Lien mat dem Persouneregëster an dem MedPerSanitas, dem Regëster vun den Dokteren hei am Land, géif Encodatiounsfeeler verhënneren. Wéi steet de Ministère (och eng Vue vum Tiers payant généralisé) zu dëser Recommandatioun?

Säit der Verëffentlechung vum Rapport goufen un der Plattform MSCAN verschidden Upassungen gemaach. Den MSACN ass am Moment awer nach net un de Persouneregister ugeschloss ginn. Wat den "Tiers-payant généralisé" ugeet, déi den honorabelen Deputéierten mentionéiert, muss drop higewise ginn, dass Patienten am Cannabis-Programm aktuell keng finanziell Charge hunn.

3. An der Äntwert op d'Fro n°7112 huet d'Madamm Ministesch erklärt: "Bis op den 30. November 2022 si 6 Flasche Cannabis-Ueleg aus dem Stock erausgaangen." An der Äntwert op d'Fro n°6171 hat d'Madamm Ministesch erklärt, dass den 30ten Mee 2022 ronn 300 Flaschen Ueleg am Stock wieren. Wéi vill Flaschen Ueleg si mëttlerweil u Patiente verdeelt ginn? Gëllt nach ëmmer eng Limitatioun, fir den Ueleg just un nei Patienten ze verdeelen?

Tëscht dem 1. September 2022 an dem 30. Mäerz 2023 goufen insgesamt 149 Flasche Cannabis-Ueleg u Patiente verdeelt. Säit dem 23. Januar 2023¹ si sämtlech Limitatiounen opgehewen. All Patient kann Cannabis-Ueleg verschriwwen kréien.

4. Am Rapport gëtt dann och erklärt, wéi d'Veerschriwungen um medezinesche Cannabis gehandhaabt ginn. Anescht wéi bei normalen Ordonnancen, ginn hei Carnets à souche un d'Doktere verdeelt, déi si och mussen zréck schécken un Division de la pharmacie et des

¹ Communication de la Circ.08.23 "Accès général aux huiles de cannabis médicinal »



médicaments fir een neie Block ze kréien. Ass dëse System, dee méi Opwand fir d'Doktere bedeit, bäibehale ginn? Wa jo, firwat? Wann nee, duerch wat gëtt en ersat?

Laut dem Gesetz vum 19. Februar 1973 an sengem Artikel 30-1, dierfe Betäubungsmittel nëmmen un Patienten verdeelt ginn, wann dës op engem *Carnet à souches* verschriwwen ginn sinn. Well de Cannabis ënnert d'Betäubungsmittel fällt, ass de System mat dem *Carnet à souches* bäibehale ginn.

5. Vu Februar 2019 op Februar 2021 ass eng Hausse vun 360% vun de Verschreiwunge vu medezineschem Cannabis festgestallt ginn. Spidolsapdikte kruten an dësem Zäitraum 778% méi Cannabis geliwwert. Wéi huet de Volumen u geliwwertem Cannabis säit Februar 2021 bis haut evaluéiert? Wéi hunn d'Veschreiwunge säit Februar 2021 evaluéiert?

2021 goufen 157kg Cannabis importéiert an 2022 waren et 283kg.

Evolutioun vun de Verschreiwungen säit Februar 2021²:

CannabisProduit	2021	2022	2023
THC-Bléien	72.67%	77.95%	76.13%
THC:CBD-Bléien	23.6%	21.66%	16.06%
CBD-Bléien	3.73%	0%	0%
Bléien (Total)	100%	99.61%	92.19%
THC-Ueleg	0%	0.12%	1.45%
THC:CBD-Ueleg	0%	0.14%	4.5%
CBD-Ueleg	0%	0.10%	1.87%
Ueleg (Total)	0%	0.36%	7.82%

2021 goufen 2.378 Ordonnancen verschriwwen, 2022 waren et der 4.881, a vum 01.01.2023 bis 21.04.2023 waren et der 1.751.

6. 70% vun de Patienten hu während der Pilotphase ëmmer dee selwechte Produit geholl. Dëst wéisst wéi wichteg eng ofgesécherst Liwwerketten ass. Eng Recommandatioun aus dem Rapport ass ganz kloer, fir d'Fournisseuren ze diversifizéieren. D'Gesondheitsministesch an de Landwirtschaftsminister haten an deem Kontext fir Enn 2022 eng juristesche Etude ugekënnegt, fir den Ubau vu medezineschem Cannabis zu Lëtzebuerg z'erlaben. Bis wéini viséieren d'Ministèren, dass dëse Projet soll an d'Realitéit ëmgesat ginn?

De Gesondheitsministère verweist op d'gemeinsam Äntwert vun der Madamm Gesondheitsministesch an vum Här Minister fir Landwirtschaft, Wäibau a ländlech

² Source : Plateforme de délivrance et de suivi MSCAN



Entwécklung op d'parlamentaresch Fro n° 7805 vum 21. Mäerz 2023 vun der honorabler Deputéiert Madamm Martine Hansen.

7. Wäert d'Regierung op de Wee vun enger Verdeelung vum medezinesche Cannabis duerch "normal" Apdikte goen, wéi et och am Rapport recommandéiert gëtt ?
Wa jo, wat ass hei den Zäitraum?
Wa nee, firwat gouf d'Recommandatioun vum Rapport net ëmgesat?

Aktuell ass heifir keen Zäitraum virgesinn. D'Cannabis-Gesetz vum 18. Juli 2018 gesäit fir, dass medizinesche Cannabis just a Spidols-Apdikten dierf verdeelt ginn. Dofir ass och an enger nächster Phase envisagéiert dëst weiderzeféieren.

Lëtzebuerg, den 16. Mee 2023

D'Gesondheitsministesch,
(s.) Paulette Lenert